

2 John

Harua Leta John Mo Ulia Leta Nike

John mo ulia leta nike, matan vara tamlohi rasua la pa eñi levosahia vara opoia enia hina aulu na mauri rasua. Mo vujangia vara opoia peresi na retivarañuhu la pa toho jara matea na mauri rasua. Mo vujangia vara Iesu enia tamlohi varañuhu matea. John vujangia vara enña ña pa opoiopoiña.

Hin leta nike

1. Retioloolo (1–3)
2. Opoia peresi na retivarañuhu (4–11)
3. Isoiso reti (12–13)

¹ Leta nike, enau patu tamlohi rasua sei John, na ulia isan hañai sei God mo viñonia peresi na natuna.* Enau peresi la haratu la levosahi na retivarañuhu, kama opoi kamim mo isoiso. ² Kama opoi kamim mata retivarañuhu mo lo toho na mapuña, ale i pa toho atu na pongi tui. ³ Moiso na usiisi vara God Tama peresi Natuna Iesu Křisto vara la pa řomñuhu hiniña, ale la řomopoiña, moiso vara la pa sileña na nora tamata, na nora retivarañuhu, ale na nora opoia. ⁴ Enau na avulahi tavera matan na rongoa vara te natum la lo ooloolo

* **1:1:** hañai peresi na natuna: reti sei hañai peresi na natuna la vereva vara John mo lo řaramia vara hañai atu enia vao kalesia matea, ale natuna enia vao kalesia matan vao kalesia atu.

na retivararuhu sohen God Tama mo retileu hinia isařa moiso.

Tamlohi Vujangi Haluhalu

⁵ Vetasiku řuhuřuhu, na sopo uliuli vara a vereho vara o pa ooloo hin te retileu paro hatea, mo vono, pani na lo uli haratu mo vereha tiroma moiso vara řa opoiopoiřa. ⁶ Opoia vararuhu enia vara řa vai na sava God mo retileu hinia moiso, ale haratu ka rongoa moiso na tapulo rani, vara řa pa hahau hinia. ⁷ Matan ka levosahia vara tamlohi haluhalu matuvana la vano na varama moiso. La tamlohi haluhalu atu la retihalu vara Iesu Křisto mo sopo mai tamlohi vararuhu. La tamlohi haluhalu atu enira meresahi non Křisto. ⁸ Ha lo kilau matara! Mo sopo řuhu vara sava kama voko řilangi matana matamim i vano hina purongo, pani ha vaihitea vara ha lavi vevuhi na nomim otori isana. ⁹ Haratu řomina mo lo vano asau na hinau la vujangia hin Křisto moiso, ale mo sopo turu hinia, haratu natu, God Tama mo sopo lo toho peresia. Pani vara tea mo toho jejeu na sava hinau la vujangia moiso, God Tama peresi Natuna la pa lo toho peresia. ¹⁰ Vara tea i mai, pani mo lavi na vujangi tinapua, ha sopo tinařihia vara i unu na imamim, ha sopo silea na retiolooolo, ¹¹ matan, vara haratu mo sile na retiolooolo isara, enia mo lo tuenira na nora hehe.

Isoiso Retiolooolo

¹² Vararuhu na opoia vara a mele vere kamim na hinau matuvana, pani na sopo opoia vara a uli na leta purongo. I pa mele řuhu vara a mai vara enřa tolu řa pa sorasora, ale řa pa avulahi tavera

matana. ¹³ Reti oloolo mo lo mai isamim mo tai
isan la natun vetasimim nike God mo viřonia.

Tangoa New Testament
The New Testament in the Tangoa Language of
Vanuatu
Le Nouveau Testament dans la langue Tangoa de
Vanuatu

copyright © 2010 Wycliffe Bible Translators, Inc.

Language: Tangoa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 11 Nov 2022 from source files dated 22 Nov 2019

89356e5c-df58-558e-9b27-ae0321adb2df